

LI CLAU

Bernat 'ro un mestre menuisié,
Meme un flambèu dins soun mestié.
Quand èro coumpagnoun, lou losso
Avié pertout roula sa bosso ;
Prouvenço, Bretagno, Poitou,
Avié tout vist, couneissié tout.
Ero vengu de si vouiage
Sèns trop d'argènt dins lou boursoun,
Mai lou cocot plen de cansoun,
De cansoun de coumpagnounage
— De cansoun, es toujours quicon, -
Uno sustout, sa preferado,
Avié trento couplet de long'...
Avans que l'aguèsse cantado
Avias lou tèms de faire un som.
L'apelavo *Lou Tour de Franço*,
La cantavo en touto oucasioun.
Noce, batème, o revihoun,
L'on i'èro coundana d'avanco.
Au maset dóu Grava de Gas
Un sèr manjavian uno lèbre.
Après lou vèire de genèbre
Que marquè la fin dóu repas,
Fauguè chascun canta la siéuno.
— Aurièi bèn vougu m'enana ; —
Mai me faguè canta la miéuno.
Pièi; venguè lou tour de Bernat.
Bernat saludè l'assistanco,
E 'ici-sèn, se meteguè 'n trin :
Entemené *Lou Tour de Franço*
Sèns faire gràci d'un refrin.
I'avié 'n bon moumen que cantavo :
Ze m'envas du Nord au Midi.
E sa cansoun s'entrelardavo
De voilà qu'alors qu'i' me dit ;
Mai la fin jamai arrivavo.—
Déjà lis enfant dourmissien,
Déjà lis ome badaiavon ;
Li fenno en dessouto risien
Emé lou couide se poussavon,
E Bernat cantavo toujours...
Mai lou Grava pèr coupa.court,
Lou Grava se levé de plaço,
E, li clau dóu mas à la man :
—“*Bernat, ve, li fenno soun lasso,*
Nous fau rebala lis enfant ;
Regardo, es dès ouro pasado.
Partèn, anan passa davans ;
Vejaqui li clau, camarado.

*Aro, canto tant que voudras ;
Quand auras fini, barraras. »*

Antòni BIGOT